

«Tgirar bain ils passagiers futurs»

Cuira: Di dal traffic public per uffants

DA GION NUTEGN STGIER / ANR

■ Per l'emprima giada han organisà las tschintg pli impurtantas organisaziuns dal traffic public da noss chantun ina occurrenza per scolaras e scolars. La finamira da quel di è da far valair als clients giuvens l'impurtanza da postas, trens ed auters meds dal traffic public. «Nus essan superads dal grond interess per l'emprima ediziun dal di dal traffic public per las scolas grischunas», quai ha ditg *Philipp Bühler* che segna tar AutoDaPosta Svizra regiun Grischun, per qualitat ed occurrenzas. Er *Manfred Kürschner*, il manager da quel manaschi, discorra dad in vair success cun sa participar passa 900 uffants a l'occurrenza. Bunamain 1200

scolaras e scolars eran annunziads per quel event en la staziun, là nua ch'ils autos da posta partan en tut las direziuns da noss chantun. «Gugent avessan nus beneventà tuts quels uffants a Cuira, dentant cun betg avair la capacitat han intginas classas gi da star a chasa», manegia *Philipp Bühler*. Sco quai ch'ils responsabels da la Posta han ditg duai quel di avair er en l'avegnir in post fix tar ils events da la Posta. Quella occurrenza duess dentant er far scola e dar impuls ad auters manaschis da posta, ordaifer noss chantun, d'organisar in di dal traffic public per uffants da la 3. e 4. classa primara. S'unidas per quella occurrenza èn las organisaziuns da traffic AutoDaPosta Grischun, la Viafier retica, las Viafiers federalas, il Bus da Cui-



Er quels trais giuvens «autists da posta» han gi plaschair dal di dal traffic public a Cuira.



In da las scolas rumantschs ch'è stada a Cuira è quella da Mustér.

FOTOS G. N. STGIER

ra ed il Bus da l'Engiadina. Sustegnì è l'event er vegnì da l'Uffizi d'energia e traffic dal Grischun e lura er da la Scola auta da pedagogia dal Grischun.

«Oz decidan savens ils uffants»

Per in di èn betg ils vehichels mellens stads ils protagonistis en la «halla» da la posta, mabain ils 900 scolars e scolaras. Il program ha tranter auter cumpiglià in viadi spezial cun la posta, ina excursiun cun in tren nostalgic ed ina visita en la garascha da las postas. Tar in di per uf-

fants dastga segir er betg mancar in program divertent e tranter auter ha *Linard Bardill*, il chantadur rumantsch, procurà per anc dapli fatschas cuntentas. Sa drizzà als 900 scolars ed 80 scolastas e scolasts ed a las autras personas è er cusseglier guvernativ *Martin Jäger*. El ha ditg ch'el saja in grond promotur dal traffic public e fetschia savens diever da postas e trens. *Philipp Bühler* fa ina bilantscha positiva da quella occurrenza. Cun quella vulain nus er mussar l'aproximitad tar noss giuvens clients e cunzunt er tgirar quels. «Oz

decidan savens ils uffants nua che'ls vulan ir durant il temp liber e per nus èsi impurtant sche quels animeschan ils geniturs da far ina excursiun cun posta ubain tren», accentuescha *Philipp Bühler*. Insumma duessan els er savair che per l'ambient e per l'ecologia saja bain meglar sche 50 personas nizzegian ils meds dal traffic public che sche mintgin va cun in auto, manegia l'um da la posta. Il tema energia ed ecologia saja perquai er stà in tema quel di che saja davairas stà in success.